

阿毗達磨法蘊足論卷第三

尊者大目乾連造

三藏法師玄奘奉 詔譯

證淨品第三之餘

於此僧中者，佛弟子衆中，此卽顯聚、顯蘊、顯部、顯要略義。預流向者，已得無間道，能證預流果，謂此無間證預流果，彼於欲界貪欲瞋恚，由世間道，先未能斷多分品類，於四聖諦，先未現觀，今脩現觀，名預流向。預流果者，謂現法中，已於三結，永斷遍知，謂有身見、戒禁取、疑，彼住此斷中，未能進求一來果證，名預流果。一來向者，已得無間道，能證一來果，謂此無間證一來果，彼於欲界貪欲瞋恚，由世間道，或先已斷多分品類，於四聖諦，先未現觀，今脩現觀，或住預流果已，能進求一來果證，名一來向。一來果者，謂現法中，已於三結，永斷遍知，及斷多分貪欲瞋恚，彼住此斷中，未能進求不還果證，名一來果。不還向者，已得無間道，能證不還果，謂此無間證不還果，彼

於欲界貪欲瞋恚，由世間道，或先永斷，於四聖諦，先未現觀，今脩現觀，或住一來果已，能進求不還果證，名不還向。不還果者，謂現法中，於五順下分結，已永斷遍知，謂有身見、戒禁取、疑、貪欲、瞋恚，彼住此斷中，未能進求阿羅漢果證，名不還果。阿羅漢向者，已得無間道，能證阿羅漢果，謂此無間證得最上阿羅漢果，或住不還果已，能進求阿羅漢果證，名阿羅漢向。阿羅漢果者，謂現法中，貪瞋癡等一切煩惱，皆已永斷，名阿羅漢果。言四雙補特伽羅者，謂預流向、預流果，是第一雙，一來向、一來果，是第二雙，不還向、不還果，是第三雙，阿羅漢向、阿羅漢果，是第四雙。八隻補特伽羅者，謂顯安立預流向等補特伽羅，八種各別。佛弟子衆者，顯示開曉佛弟子衆，具勝功德。戒具足者，謂學、無學僧，成就具足學、無學、戒。定具足者，謂學、無學僧，成就具足學、無學、定。慧具足者，謂學、無學僧，成就具足學、無學、慧。解脫具足者，謂學、無學僧，成就具足學、無學、解脫。智見具足者，謂學、無學僧，成就具足學、無學、智見。言應請者，謂應惠施、應供養、應祠祀，故言應請。言應屈者，謂已惠施、善惠施，已供養、善供養，已祠祀、善祠祀，少作功德，獲大果利，故名應屈。應恭敬者，謂若識知，若不識知，皆

應起迎，曲躬合掌，稽首接足，而讚問言：「正至正行，得安樂，不名應恭敬。言無上者，如世尊告苾芻衆言：一切和合部類衆中，佛弟子衆，最爲第一，最尊、最勝、最上、無上，故名無上。言福田者，如世尊告阿難陀言：我不見有諸天魔梵、沙門、婆羅門等天人衆中，堪受已惠施、善惠施，已供養、善供養，已祠祀、善祠祀，如我僧者。阿難當知：若於我僧，已惠施、善惠施，已供養、善供養，已祠祀、善祠祀，作少功勞，獲大果利。又如天帝至鷲峰山，以妙伽他，讚問佛曰：

稽首能辯說，到諸法彼岸，超一切恐怖，大喬答摩尊，
有無量衆生，樂福脩布施，恒發至誠信，脩諸有依福，
願佛垂哀愍，說眞勝福田，令無量衆生，少施獲大果。

世尊哀愍諸衆生故，以妙伽他，告天帝曰：

若無量衆生，樂福脩布施，恒發至誠信，脩有依福者，
我今爲汝等，說眞勝福田，令無量衆生，少施獲大果。
若行四聖向，及住四聖果，是應供眞僧，具勝戒定慧。

此眞勝僧田，功德甚廣大，能無量潤益，猶如四大海。
調御勝弟子，已發法光明，堪受勝供養，及受勝祠祀。
於少僧行施，卽施一切僧，必當獲大果，一切智稱讚。
於諸福田中，僧田最爲勝，諸佛所稱歎，施獲最上福。
於佛弟子衆，少施獲大果，故諸聰慧人，當供養僧衆。
聖衆持妙法，具明行等持，故於僧寶中，行施最爲上。
以三種淨心，施僧衣飲食，必獲殊勝報，成人天善士。
定於生生中，離塵垢毒箭，超過諸惡趣，受人天勝樂。
自正集珍財，自手而行施，爲利自他故，必獲於大果。
諸有聰慧人，淨信心行施，當生安樂界，受妙樂聰明。

由如是說，故名福田。世應供者，謂聖弟子。能淨世間，應供器故；已行應供，清淨道故；成就應供，三淨業故；名世應供。若聖弟子，以如是相，隨念僧伽，見爲根本，證智相應，諸信信性，現前信性，隨順印可愛慕，愛慕性，心證心淨，是名僧證淨。若能於此勸勵

安立，當知是名方便勸勵安立，令住僧證淨中。

云何聖所愛戒，謂無漏身律儀，語律儀，命清淨，是名聖所愛戒。何故名爲聖所愛戒。謂諸佛及弟子，名爲聖；彼於此戒，愛慕欣喜，忍順不逆，是故名爲聖所愛戒。若能於此勸勵安立，當知是名方便勸勵安立，令住聖所愛戒中。

沙門果品第四

一時，薄伽梵，在室羅筏，住逝多林，給孤獨園。爾時世尊，告苾芻衆：有四沙門果，何等爲四？謂預流果，一來果，不還果，阿羅漢果。

云何預流果？謂預流果，略有二種，一者，有爲，二者，無爲。所言有爲預流果者，謂彼果得，及彼得得，有學根力，有學尸羅，有學善根，八有學法，及彼種類諸有學法，是名有爲預流果。所言無爲預流果者，謂於此中，三結永斷，及彼種類結法永斷，卽是八十八諸隨眠永斷，及彼種類結法永斷，是名無爲預流果。

云何一來果？謂一來果，略有二種，一者，有爲，二者，無爲。所言有爲一來果者，謂彼果得，及彼得得，有學根力，有學尸羅，有學善根，八有學法，及彼種類諸有學法，是名有

爲一來果。所言無爲一來果者，謂於此中，三結永斷，及彼種類結法永斷，卽是八諸隨眠永斷，及彼種類結法永斷，並貪瞋癡多分永斷，及彼種類結法多分永斷，是名無爲一來果。

云何不還果，謂不還果，略有二種，一者，有爲，二者，無爲。所言有爲不還果者，謂彼果得，及彼得得，有學根力，有學尸羅，有學善根，八有學法，及彼種類諸有學法，是名有爲不還果。所言無爲不還果者，謂於此中，五順下分結永斷，及彼種類結法永斷，卽是九十二諸隨眠永斷，及彼種類結法永斷，是名無爲不還果。

云何阿羅漢果，謂阿羅漢果，略有二種，一者，有爲，二者，無爲。所言有爲阿羅漢果者，謂彼果得，及彼得得，無學根力，無學尸羅，無學善根，十無學法，及彼種類諸無學法，是名有爲阿羅漢果。所言無爲阿羅漢果者，謂於此中，貪瞋癡等一切煩惱，皆已永斷，超一切趣，斷一切道，三火永靜，渡四瀑流，憍逸永離，焦渴永息，窟宅永破，無上究竟，無上寂靜，無上愛盡，離滅涅槃，是名無爲阿羅漢果。

通行品第五

一時，薄伽梵，在室羅筏，住逝多林，給孤獨園。爾時世尊，告苾芻衆：有四通行，何等爲四？謂苦遲通行，苦速通行，樂遲通行，樂速通行。云何名爲苦遲通行？如世尊說：諸有苾芻，由五取蘊，陵辱傷毀，彼因如是五種取蘊，逼切拘執，如扼重擔，乃至命終，恒常隨逐，便於如是五取蘊中，深生厭賤，呵毀拒逆，卽於如是五取蘊中，所生厭賤，呵毀拒逆，此中名苦。由此便起，味、鈍、羸、劣、信等五根，昧故，鈍故，羸故，劣故，能遲證得，無上漏盡。此言遲者，非急，非疾，非駛，非易，非速證得。言無上者，如世尊說：於諸有爲無爲法中，我說離染，最爲第一，最尊最勝，最上無上，於無上法，能得，隨得，能觸，等觸，能證，作證，故名證得。言漏盡者，漏有三漏，欲有無明，於此三漏，能盡，等盡，遍盡，永盡，滅盡，圓盡，故名漏盡。言通行者，謂卽此行，超越勇猛，精進策勵，生欲翹勤，於四聖諦，脩現觀行，於預流果，一來，不還，阿羅漢果，修作證行，於貪、瞋、癡、慢、憍、垢等，脩永盡行，以極恭敬安住，殷重思惟，遍攝諸心所已，因故，門故，理故，相故，脩通達行，是故名爲苦遲通行。又如是行，於所求義，由脩習多脩習，能得隨得，能觸等觸，能證作證，是故名爲苦遲通行。又如是行，由語增語，由想等想，施設言說，爲苦遲通行，是故名爲苦遲通

行。云何名爲苦速通行？如世尊說：諸有苾芻，由五取蘊，陵辱傷毀，彼因如是五種取蘊，逼切拘執，如扼重擔，乃至命終，恒常隨逐，便於如是五取蘊中，深生厭賤，呵毀拒逆；卽於如是五取蘊中，所生厭賤，呵毀拒逆，此中名苦。由此便起明、利、強、盛、信等五根，如是五根，明故，利故，強故，盛故，能速證得無上漏盡。此言速者，能急、能疾、能駛、能易，能速證得。言無上者，如世尊說：於諸有爲無爲法中，我說離染，最爲第一，最尊最勝，最上無上，於無上法，能得、隨得、能觸、等觸，能證、作證，故名證得。言漏盡者，漏謂三漏，於此三漏，能盡、等盡，遍盡、永盡，滅盡、圓盡，故名漏盡。言通行者，謂卽此行，超越勇猛，精進策動，生欲翹勤，於四聖諦，脩現觀行，於預流果，一來、不還、阿羅漢果，脩作證行，於貪、瞋、癡、慢、憍、垢等，脩永盡行，以極恭敬安住，殷重思惟，遍攝諸心所已，因故，門故，理故，相故，脩通達行，是故名爲苦速通行。又如是行，於所求義，由脩習多脩習，能得、隨得，能觸等觸，能證、作證，是故名爲苦速通行。又如是行，由語增語，由想等想，施設言說，爲苦速通行，是故名爲苦速通行。云何名爲樂遲通行？如世尊說：諸有苾芻，離欲惡不善法，有尋有伺，離生喜樂，於初靜慮，具足安住，尋伺止息，內等淨心一趣，

無尋無伺，定生喜樂，於第二靜慮，具足安住，離喜住捨，正念正知，身受樂，聖所說，具捨念安樂住，於第三靜慮，具足安住，斷樂斷苦，先喜憂沒，不苦不樂，捨念清淨，於第四靜慮，具足安住，彼於爾時，非思自害，非思害他，非思俱害，能思自利，能思利他，能利多生，能樂多生，能惑世間，能義利樂諸天人衆，諸無害等，此中名樂。由此便起味、鈍、羸、劣、信等五根，如是五根，昧故，鈍故，羸故，劣故，能遲證得無上漏盡。此言遲者，非急、非疾、非駛、非易，非速證得。言無上者，如世尊說：於諸有爲無爲法中，我說離染，最爲第一，最尊最勝，最上無上，於無上法，能得、隨得，能觸等觸，能證、作證，故名證得。言漏盡者，漏謂三漏，能盡、等盡，遍盡、永盡，滅盡、圓盡，故名漏盡。言通行者，謂卽此行，超越勇猛，精進策勵，生欲翹勤，於四聖諦，脩現觀行，於不還果，阿羅漢果，脩作證行，於神境智，作證通，及天耳智，作證通，心差別智，作證通，宿住隨念智，作證通，死生智，作證通，漏盡智，作證通，脩作證行，於貪、瞋、癡、慢、憍、垢等，脩永盡行，以極恭敬安住，殷重思惟，遍攝諸心所已，因故，門故，理故，相故，修通達行，是故名爲樂遲通行。又如是行，於所求義，由脩習多脩習，能得、隨得，能觸等觸，能證、作證，是故名爲樂遲通行。又如

是行，由語增語，由想等想，施設言說，爲樂遲通行，是故名爲樂遲通行。云何名爲樂速通行？如世尊說：諸有苾芻，離欲惡不善法，廣說乃至於第四靜慮，具足安住，彼於爾時，非思自害，非思害他，非思俱害，能思自利，能思利他，能利多生，能樂多生，能愍世間，能義利樂諸天人衆，諸無害等，此中名樂。由此便起明、利、強、盛、信等五根，如是五根，明故、利故、強故、盛故，能速證得無上漏盡。此言速者，能急、能疾、能駛、能易，能速證得。言無上者，如世尊說：於諸有爲無爲法中，我說離染，最爲第一，最尊最勝，最上無上，於無上法，能得隨得，能觸等觸，能證作證，故名證得。言漏盡者，漏謂三漏，於此三漏，能盡等盡，遍盡、永盡、滅盡、圓盡，故名漏盡。言通行者，謂卽此行，超越勇猛，精進策勵，生欲翹勤，於四聖諦，修現觀行，於不還果，阿羅漢果，脩作證行，於神境智，作證通，及天耳智，作證通，心差別智，作證通，宿住隨念智，作證通，死生智，作證通，漏盡智，作證通，脩作證行，於貪、瞋、癡、慢、憍、垢等，脩永盡行，以極恭敬安住，殷重思惟，遍攝諸心所已，因故、門故、理故、相故，脩通達行，是故名爲樂速通行。又如是行，於所求義，由脩習多脩習，能得隨得，能觸等觸，能證作證，是故名爲樂速通行。又如是行，由語增

語，由想等想，施設言說，爲樂速通行，是故名爲樂速通行。此中若於苦遲通行，脩習多脩習，能令苦速通行，速得圓滿。若於樂遲通行，脩習多脩習，能令樂速通行，速得圓滿。又若於彼苦遲通行，脩習多脩習，能令樂遲通行，速得圓滿。若作苦速通行，脩習多脩習，能令樂速通行，速得圓滿。

聖種品第六

一時，薄伽梵，在室羅筏，住逝多林，給孤獨園。爾時世尊，告苾芻衆：有四聖種，是最勝，是種姓，是可樂，現無雜穢，曾無雜穢，當無雜穢，一切沙門，或婆羅門，或天梵魔，或餘世間，無能以法而譏毀者。何等爲四？謂我多聞賢聖弟子，隨得衣服，便生喜足，讚歎喜足，不爲求覓衣服因緣，令諸世間而生譏論；若求不得，終不懊歎，引頸希望，拊膺迷悶；若求得已，如法受用，不生染著，耽暗迷悶，藏護貯積；於受用時，能見過患，正知出離，彼由隨得衣服喜足，終不自舉，陵蔑於他，而能策勤，正知繫念，是名安住古昔聖種。如是弟子，隨得飲食，便生喜足，廣說如前。如是弟子，隨得臥具，便生喜足，廣說如前。如是弟子，愛斷樂斷，精勤隨學，於斷愛樂；愛脩樂脩，精勤隨學，於脩愛樂；彼由

如是斷脩愛樂，終不自舉，陵蔑於他，而能策勤，正知繫念，是名安住古昔聖種。謂我多聞賢聖弟子，成就如是四聖種者，若依東南西北方住，不樂居彼，而彼樂居，於樂不樂，俱能含忍。爾時世尊，爲攝前義，而說頌曰：

勇不樂居彼，而彼樂勇居，於樂不樂中，勇者俱含忍。
既棄捨諸欲，無物能拘礙，如瞻部真金，誰復應譏毀？

有四聖種，是最勝者：謂四聖種，是一切佛及諸弟子，共所施設，爲最勝故。是種姓者：謂四聖種，是一切佛及諸弟子，古昔不共家種姓故。是可樂者：謂四聖種，是一切佛及諸弟子，久遠已來，晝夜等時，可樂法故。現無雜穢者：謂四聖種，不爲現在惡不善法，親近塗染，性不雜彼，能遠離故。會無雜穢者：謂四聖種，不爲過去惡不善法，親近塗染，性不雜彼，能遠離故。當無雜穢者：謂四聖種，不爲未來惡不善法，親近塗染，性不雜彼，能遠離故。諸沙門等，無能以法而譏毀者：謂四聖種，非一切佛及諸弟子，或諸賢貴，或諸善士，而能譏毀。謂此聖種，是不善法，是下賤者，信解受持，能爲自害，能爲他害，能爲俱害，能滅智慧，能礙彼類，能障涅槃，受持此法，不生通慧，不引菩提，不

證涅槃，聖種非彼，譏毀法故。隨得衣服，便生喜足者：謂隨所得糞掃衣服，或隨所得施主衣服，若好若惡，便生喜足，取得蔽身障寒等故。讚歎喜足者：謂數讚歎，於隨所得衣服喜足，謂此喜足，能引長夜，少欲喜足，易滿易養，損減諸惡，增長諸善，能速圓滿，杜多功德，於諸資具，能善知量，能令自他，身心嚴淨，數讚歎者，非數發言，但有此見，隨緣而說，令他欽重，此喜足故。非爲求覓衣服因緣，令諸世間生譏論者：謂佛弟子，非如一類，爲求衣服，往施主家，詐現威儀，矯設言論，現相研磨，以利求利，令諸世間多生譏論，諸佛弟子，與彼相違故，不令他生諸譏論。若求不得，終不懊歎等者：謂佛弟子，求覓衣食，不遂意時，終不懊歎，引頸悒望，拊膺迷悶，懊，謂心熱，等熱，徧熱，內憤焦煌，愁憂悔恨，如箭入心，不能自處，煩冤懇切，總名爲懊歎。謂如是心熱惱已，作是思維，我無衣服，當設何等方略自濟。因斯發起種種語言，述所思惟，總名爲歎。引頸希望者：謂懊歎已，復引頸希望，施主迴意，拊膺迷悶者：謂久待不得，絕所悒望，拊膺迷悶，諸佛弟子，皆無是事。若求得已，如法受用，不生染著等者：謂佛弟子，求得衣服，如法受用，心無染著，耽嗜迷悶，藏護貯積，染著等言，皆顯貪愛，前後輕重，分位差

別。於受用時，能見過患，正知出離者：謂佛弟子，受用所得諸衣服時，能見過患，謂此衣服，無常轉動，求時勞倦，受用非理，生長疾病，是失壞法，是增減法，暫得還失，迅速不停，本無今有，有已還無，不可保信，又受用時，正知出離，成就趣向，出離慧故，爲趣涅槃，受用衣服，又受用時，先調貪欲，次斷貪欲，後出貪欲，由此因緣，心於衣服，離染解脫。彼由隨得衣服喜足，終不自舉，陵蔑他者：謂佛弟子，雖於所得衣服喜足，而不自舉，陵蔑於他，非如一類，由此喜足而自憍舉，作是念言：我有如是少欲喜足，少事少務，少所作，少顧戀，易滿易養，損減諸惡，增長諸善，能速圓滿，杜多功德，於諸資具，能善知量，能善爲他讚歎喜足，非如一類，由此喜足，陵蔑於他，作是念言：餘苾芻等，皆無如是少欲喜足，少事少務，廣說乃至能善爲他讚歎喜足，諸佛弟子，皆無是事。而能策勤，正知繫念者：謂佛弟子，於隨所得衣服喜足，如法受用，不生染著，能見過患，正知出離，不自憍舉，不陵蔑他，復能策勤，正知繫念，言策勤者，顯正精進，正知者，顯正見，繫念者，顯正念，此略顯示三種道支。是名安住古昔聖種者：初是名，言顯佛弟子，成就前說調善意樂，後古昔聖種，言顯去來今一切賢聖，皆於如是聖種脩習，

及多脩習，方至究竟；中安住，言顯佛弟子，於隨所得衣服喜足，增上所生善，有漏道，及無漏道，安住等住，遍住近住。如是弟子，隨得飲食，便生喜足者：謂佛多聞賢聖弟子，於隨乞食所得飲食，或隨迎請所得飲食，若好若惡，便生喜足，取得支身，除飢渴故。廣說如前者：讚歎喜足等，廣說如前，於隨所得衣服喜足。如是弟子，隨得臥具，便生喜足者：謂佛多聞賢聖弟子，於隨所得樹下臥具，或隨所得房閣臥具，若好若惡，便生喜足，取得資身，除勞倦故。廣說如前者：讚歎喜足等，廣說如前，於隨所得衣服喜足。如是弟子，愛斷等者：謂佛多聞賢聖弟子，愛斷愛脩，樂斷樂脩，精勤隨學，斷脩愛樂，云何愛斷愛脩？謂若未斷惡，不善法，未脩善法，彼於斷脩，無愛無勝愛，有引頸悌望；若有已斷惡，不善法，已脩善法，彼於斷脩，有愛有勝愛，無引頸悌望。云何樂斷樂脩？謂於斷脩，有樂有勝樂。云何精勤隨學？斷脩愛樂，謂於斷脩愛樂，爲增上故，精勤隨學。彼由如是斷脩愛樂，終不自舉，陵蔑他者，謂佛弟子，雖於斷脩愛樂，精勤隨學，而不自舉，陵蔑於他，非如一類，由此愛樂而自憍舉，作是念言：我有如是少欲喜足，少事少務，少所作，少顧戀，易滿易養，損減諸惡，增長諸善，愛斷愛脩，樂斷樂脩，精

勤隨學，斷脩愛樂；非如一類，由此愛樂，陵蔑於他，作是念言：餘苾芻等，皆無如是少欲喜足，少事少務，廣說乃至愛斷愛脩，樂斷樂脩，精勤隨學，斷脩愛樂，諸佛弟子，皆無是事，而能策勤，正知繫念，是名安住古昔聖種，廣釋如前。有差別者，中安住言顯佛弟子，於斷脩愛樂，增上所生善有漏道，及無漏道，安住等住，遍住近住。

正勝品第七之一

一時，薄伽梵，在室羅筏，住逝多林，給孤獨園。爾時世尊，告苾芻衆：有四正勝，何等爲四？謂有苾芻，爲今已生惡，不善法斷故，起欲發勤精進，策心持心，是名第一。爲令未生惡，不善法不生故，起欲發勤精進，策心持心，是名第二。爲令未生善法生故，起欲發勤精進，策心持心，是名第三。爲令已生善法堅住不忘，脩滿倍增，廣大智作證故，起欲發勤精進，策心持心，是名第四。爾時世尊，爲攝前義，而說頌曰：

初脩正勝時，已勝生死有，若脩至彼岸，能摧滅魔軍。

離塵垢諸德，非惡緣所退，到彼岸涅槃，證無餘極樂。

爲令已生惡，不善法斷故，起欲發勤精進，策心持心者，云何已生惡，不善法，謂過去

現在五蓋：一、貪欲蓋，二、瞋恚蓋，三、昏沉睡眠蓋，四、掉舉惡作蓋，五、疑蓋。云何爲令已生惡，不善法斷故正勝？謂有苾芻，爲斷已生貪欲蓋故，如理思維：彼貪欲蓋，多諸過患，謂是不善法，是下賤者，信解受持；佛及弟子，賢貴善士，共所訶厭；能爲自害，能爲害他，能爲俱害，能滅智慧，能礙彼類，能障涅槃；受持彼法，不生通慧，不引菩提，不證涅槃；如是思惟，發勤精進，勇健勢猛，熾盛難制，勵意不息，此道名爲能令已生諸貪欲蓋永斷正勝；彼於此道，生已脩習多脩習故，便斷已生諸貪欲蓋。起欲者，謂爲斷已生貪欲蓋故，便起等起，及生等生，聚集出現，欲樂欣喜，求趣悌望，彼由生起此諸欲故，便斷已生諸貪欲蓋。發勤精進者，謂爲斷已生貪欲蓋故，發勤精進，廣說乃至勵意不息，彼由此故，便斷已生諸貪欲蓋。策心者，謂爲斷已生貪欲蓋故，精勤脩習，喜俱行心，欣俱行心，策勵俱行心，不下劣俱行心，不闇昧俱行心，捨俱行心，定俱行心，彼由脩習如是心故，便斷已生諸貪欲蓋。持心者，謂爲斷已生貪欲蓋故，持心脩習八支聖道，所謂正見，乃至正定，彼於此道，持心脩習多脩習故，便斷已生諸貪欲蓋。復有苾芻，爲斷已生貪欲蓋故，如理思惟：出家功德，如是出家，是真善法，是尊勝

者信解受持；佛及弟子，賢貴善士，共所欣讚；不爲自害，不爲他害，不爲俱害，增長智慧，不礙彼類，不障涅槃，能生通慧，能引菩提，能證涅槃；如是思惟：發勤精進，廣說乃至勵意不息，此道名爲能令已生諸貪欲蓋永斷，正勝；彼於此道，生已脩習多脩習故，便斷已生諸貪欲蓋。起欲乃至策心持心，皆如前說。復有苾芻，爲斷已生貪欲蓋故，如理思惟：彼貪欲蓋，如病如癰，如箭惱害，無常苦空，非我轉動，勞倦羸篤，是失壞法；迅速不停，衰朽非恒，不可保信，是變壞法；如是思惟：發勤精進，廣說乃至勵意不息，此道名爲能令已生諸貪欲蓋永斷，正勝；彼於此道，生已脩習多脩習故，便斷已生諸貪欲蓋。起欲乃至策心持心，皆如前說。復有苾芻，爲斷已生諸貪欲蓋，如理思惟：滅爲寂靜，道能出離，如是思惟：發勤精進，廣說乃至勵意不息，此道名爲能令已生諸貪欲蓋永斷，正勝；彼於此道，生已脩習多脩習故，便斷已生諸貪欲蓋。起欲乃至策心持心，皆如前說。如貪欲蓋，餘四亦爾，有差別者，應說自名。復有苾芻，爲斷已生隨一種類惡不善法，如理思惟：彼惡不善法，多諸過患，謂是不善法，是下賤者信解受持，廣說乃至不證涅槃；如是思惟：發勤精進，廣說乃至勵意不息，此道名爲能

令已生隨一種類惡不善法永斷，正勝；彼於此道，生已脩習多脩習故，便斷隨一種類已生惡不善法。起欲者：謂爲斷已生隨一種類惡不善法，便起等起，廣說乃至求趣悌望，彼由生起此諸欲故，便斷隨一種類已生惡不善法。發勤精進者：謂爲斷已生隨一種類惡不善法，發勤精進，廣說乃至勵意不息，彼由此故，便斷隨一種類惡不善法。策心者：謂爲斷已生隨一種類惡不善法，精勤脩習喜俱行心，廣說乃至定俱行心，彼由脩習如是心故，便斷隨一種類已生惡不善法。持心者：謂爲斷已生隨一種類惡不善法，持心脩習八支聖道，彼於此道，持心脩習多脩習故，便斷隨一種類已生惡不善法。復有苾芻，爲斷已生隨一種類惡不善法，如理思惟：出家功德，如是出家，是真善法，是尊勝者信解受持，廣說乃至能證涅槃；如是思惟：發勤精進，廣說乃至勵意不息，此道名爲能令已生隨一種類惡不善法永斷，正勝；彼於此道，生已脩習多脩習故，便斷隨一種類已生惡不善法；起欲乃至策心持心，皆如前說。復有苾芻，爲斷已生隨一種類惡不善法，如理思惟：彼惡不善法，如病如癰，廣說乃至是變壞法；如是思維：發勤精進，廣說乃至勵意不息，此道名爲能令已生隨一種類

惡不善法永斷、正勝、彼於此道，生已脩習多脩習故，便斷隨一種類已生惡不善法；起欲乃至策心持心，皆如前說。復有苾芻，爲斷已生隨一種類惡不善法，如理思維滅爲寂靜，道能出離，如是思惟發勤精進，廣說乃至勵意不息，此道名爲能令已生隨一種類惡不善法永斷、正勝、彼於此道，生已脩習多脩習故，便斷隨一種類已生惡不善法；起欲乃至策心持心，皆如前說。

說一切有部法蘊足論卷第三